

卷

施

閣

集

卷施閣文乙集卷三

陽湖洪亮吉著

楚相孫叔敖廟碑

隆古以來吾知之矣高卑甫形君與民近天子猶一方之吏九重有並耕之說沾體塗足日接于巍巍茅茨土階不隔于攘攘覓哉上乎九紀以降五遷以前惠民之實事歸于元首乎由周以來亢鋸益密閭閻九重黔首不能歷其一繁露十二圓顙不能瞻其秒又人列十等國及數圻非夫實心之宰莫就小康之俗而循吏一傳權輿于司馬春秋五人兆始于南郢則實惟楚相孫叔敖云相君期思之鄙夫荆楚之下士推其登進之由投分之始則婉孌之一

人膺薦賢之上賞焉道由于莊王罷朝樊姬立侍牀第一
語史臣書于廟策朝宁三歎尸臣易其常度人以謂南服
之霸非君王之謂樊姬之力也吾以謂令尹之進非虞邱
之功掩袖之效也然相君本幼而神靈長而秀羸殆庶隣
于亞聖儀表出于齊俗有多能之稱稟無欲之性一日出
見岐頭蛇殺而埋之啜其泣矣是將死矣其誰知之母也
聖善庸何傷乎子有陰德是知一成而爲敦蛇邱以之著
號兩首謂之枳妖德因而自戕及其相也四境咸喜一人
獨弔相君降赤芾之尊盼白冠之語位益高而志下宦益
大而心小同虎乳之三已凜狐邱之六言四牡戒其疾則
剗牝馬之貞一狐怯其溫方縫羖羊之鞢利前害後悟主

于蟬翼泉輕幣重利民于蟻鼻迨夫百事具舉精心爲政
衡前于軛三年而不知輪庖于相半歲而自易百金之珎
無益而可碎三尺之喙不言而奚事又修僕區之法擇鬻
熊之典舉荆尸之政紹封汝之規惟此文德益之武烈詩
曰元戎十乘軍志曰先聲奪人盛矣哉勝則河雍之濱封
武軍之尸敗則敖郃之間食嬖人之肉霸業之定由勝算
之先與至夫爲于一日利及千祀築芍陂濬陽泉淮南王
書曰決期思之流以灌雩婁之野皇覽云激沮水之波以
作雲夢之澤後有知者楚南大澤之池誰其嗣之廬江萬
戶之邑謹案祀典曰法施于民勞以定國非是之謂乎夫
其三仕三黜勤拳于當國十世二世綢繆于家事固知尺

帛之暖不逮于生前負薪之困將貽于身後而存資相工之益沒餘伶人之助越襪荆鬼避一名于寢邱吳岡妒谷環萬禩于封邑君子之澤非將斬于五世廉吏可爲行有奮于百代焉廟蓋創于西京之初修于延熹之歲棟宇隳壞則感夢示之兆輪奐聿新則遷秩酬其德迄二千年有舉莫廢知縣謝君慕潘國之政紹魏郡之績方校輿地著士女之志遂覽勝蹟涉名賢之庭見夫曠而不修憬焉而懼又以其地逼隘遂移先賢句子之祠祭于別所增其式廊需以時日廟成乞爲文于石時予方助修縣志校勘圖經陵谷未變長掖之碑已迷淮流方漲北隅之基宛在竊以爲旣食其利必報其功連山之竹木相君之所植九畢

之蕃廩小民之所利平田納秸則一畝浮于十鍾方舟下
粟則數鄉濟于百縣昔云堯塉下濕今惟沃饒上土惠此
中國遺于孫子矣余感夫循良之首美利之廣宣尼未生
不及流遺愛之涕薦賈先隕無由識治民之效而使東南
之民日出而尸祝百世之下春祠而歌舞中興主相聞縣
名而動色末世嗣續入崇廡而頒胙則奉法舉職守死善
道之吏均未得及焉是以班固作史宰相入于良吏范氏
紀載司空儕于牧守莫不舉此成法譜彼風愛斯所謂知
致治之體得核實之道矣則夫綰黃綬乘墨車至祠下者
流連乎堂戶留覽于豆俎遐哉渺焉蓋移風易俗之事孰
不由于此焉

八月十五泛舟白雲谿詩序

小雨忽晴秋花轉媚雲谿小閣月來沉沉錢唐郭生南巷
呂子或攜壺觴遠挈簫篴予與孫君買舟淡港徑可十尺
租才百錢王生居廬疊市甘脆棧栗之屬粲已盈艇與二
三子拍浮其中幃袖作帆折柳代檝西經紅橋東阻北郭
兩岸宿鳥一川遊魚隨波沸騰離樹上下啾啾唧唧聲不
得歇沿谿以北梢有竹樹下蔭密藻寬可彌畝黑白萬羽
浮沉千頭波喧葉飛悉萃其裏從洲以南檐瓦可數橋陰
數尺乃界中外孤簫一聲高樹荅響呂生歌狂不覺離口
樓閣半里鉤簾一時兒童不眠應以拊掌歌韻欲寂盈觴
勸酬欣羅狂譚樂說舊事忽復相覩首已如沐陰肩旣冷

零露可挹離離星辰方訝西暗川東曉華驚見日出相與
登岸因而賦詩里傳其狂訝爲逸嗟乎半世之樂成于
奉親百晝之娛奚若選夕奈何中歲各值多故星辰淪乎
昔約風雨破其奇裏顏非朱而潭鯉驚衣皆麻而林鳥訝
此則攬盈尺之照則逃影于閨聆入秋之聲而離樹却走
也以少歲之遊畢于此夕故振筆序之以貽數子亦以志
不忘耳詩凡若干首時乾隆四十一年丙申八月十五日
越三歲己亥十月二十日序同游者爲錢唐郭鎔同縣呂
星垣孫星衍王育璇凡五人

適王氏亡姑權厝志銘

先君子同產七人其五爲適高氏亡姑歸縣學生其泰早

卒者也姑又次之年最幼與諸兄弟齒故行第七家人咸呼七姑云魯國嬌女扶風幼妹生甫數月卽罹家屯時先王父追償大同城工核減帑項臺符屢下折田券以輸官囊金已空鬻鳴琴而餬屋爰自雲谿里舊第遷于中河橋賃舍脩脩予羽業鴟鴞之四章依依降桑均鴈鳩之七子甌生塵而日宴風吹穉以歲寒然而歌詩甫半悟鹿食之相呼魯論未終結鶉衣而不耻以儒風移其閨識者也乾隆十七年歸國子監生王君汝桂琴瑟靜好松柏悅心樂羊廢讀則正容以悟之周郁耽遊則流涕而私諫尊親嘉其有禮所天感其柔誠無何值歲元枵傷夫奇疾文宣見兆知宏微之倏奄蔣侯示神識悅豫之不永截髮夜禱則

光暗北辰割肌晨饋則血溢衷和靈場之鑑自燼虛牖之
幔驚開雖戟手爲厲尤避貞姬而搏膺之言親聞弱婢臨
終誦詩而逝未知其祥也嗟乎語怪之錄哲人所懲而無
鬼之言阮生已屈同禍三載侍疾七旬摩笄自刺則慈母
驚啼對食不殮則君姑繞泣痛心誓殯掃跡居樓連廬而
語不聞隣限室而影無踰闕蓋雖雅志竟遠而已枯魂待
斃者矣先王父憂之俾敢紗幔以授徒餽蒿簪而教讀童
姬繞案便號經師幼姒入門咸稱弟子亮吉每以春秋暇
日參訊起居念揚水而傷心勉遺孤于忠孝盡一門兄子
雅愛李膺兩世曠僚惟期沈正先是監生君父某三世未
葬七棺在堂平原則哲孫屢殤信都則全家善病姑每以

爲憂微而入諫某未之急也無何姑亦遘疾以卒烏乎哀哉松枝生室華屋廢爲山邱桃符貼窗餐厨減于藥竈鄭宗孝婦雖代尊章之愆賴川悖守將受亡靈之責姑生于雍正五年月日卒以乾隆四十四年七月九日守節二十五年年五十有二無子以翁命撫族子及異姓子各一人甥而禰舅不聞昔經子又生孫望之異日以監生君未葬故權厝于某所禮也積陰之氣旣驟損乎生人陳殯之居或不容於列匱重爲之銘曰

繫中閨之弱質兮風降志于典墳旣怡松而悅柏兮乃出室而字人嗟三年之失儷兮羌廿載以酬身視雙棺之前後兮隨七殯而紛陳厝厝之未可久兮亦聊以妥夫貞魂

與孫季述書

季述足下日來用力何似亮吉三千里外每有造述手未握管心懸此人雖才分素定亦契慕有獨至也吾輩好尙旣符嗜欲又寡幼不隨搔頭美姿顧影促步之客以求一時之憐長實思研精蓄神忘寢與食以希一得之獲惟吾年差長憂患頻集坐此不逮足下耳然大馬之齒三十有四距強任之日尙復六年上亦美展尺寸之効竭志力以報先人下庶幾烝竹帛之聲傳姓名以無慙生我每覽子桓之論日月逝于上體貌衰于下忽然與萬物遷化及長沙所述佚遊荒醉生無益于時死無聞于後是自棄也感此數語掩卷而悲并日而學又傭力之暇餘晷尙富踈野

之質本乏知交雞膠膠則隨暗影以披衣燭就跋則攜素冊以到枕衣上落虱多而不嫌凝塵浮冠日以積寸非門外入刺巷側過車不知所處在京邑之內所居界公卿之間也夫人之知力有限今世之所謂名士或縣心于貴勢或役志于高名在人者未來在已者已失又或放情于博奕之趣畢命于花鳥之妍勞瘁旣同歲月共盡若此皆巧者之失也間嘗自思使揚子雲移研經之術以嬭世未必勝漢廷諸人而坐廢深沉之思韋宏嗣舍著史之長以事棊未必充吳國上選而并亡漸漬之效二子者專其所獨至而置其所不能爲足如耳每以自慰亦惟敢告足下也錢獻之注爾雅釋地四篇序

重光赤奮若元月吾友錢君獻之注爾疋釋地四篇畢時
予方䟽國語地名未竟病茆驄之莫定阻彤魚之乏證効
采金石按稽或窮高觀周秦披覽亦徧聆遂得于許氏臯
落證以韓生廣都之壠注乃增乎韋昭卑耳之谿名堪通
于劉向以墮高之文識觸山之語誕由田渭之蹟知惠寶
之傳疑國語共工氏墮高堙痺知列子淮南觸山折柱所
由附會也又晉語爲惠公從予于渭濱渭濱韓非
子書作惠寶茫茫一編窺古獨笑焉蓋六合云渺難從豎亥之

步三古甚遠誰詳伯翳所名而儒者好破舊聞矜其臆獲
甚或變易陵阜移徙川澤此則超北溟之說非屬寓言移
太行之語遂成左證也夫創奇者旣信心之已過守故者
又目證而或離以數雜之居諸窮八埏之浩渺知其難矣

又況高下定名肇于文命川藪著錄仿自元公梁卜之所
未言樊李于焉缺注卽云證之別簡而東陵未究先地昧

于金蘭

漢地理志廬江郡金蘭西北有東陵鄉水經注廬江郡有金蘭縣按金蘭無所考二漢亦無此縣水

經注縣字

富橋山屢移遂神迷于劍舄而能采茲衆說成乎

一是高平廣平皆區方之可指朝陽夕陽非向背之虛號
則前哲之所未及視景純而或過者焉時孫君季述亦注
山海經削諸迂怪之談證以耳目所及揖夷堅于上世諒
厥用心友裴酈于六朝均茲命意蓋輿地之學至今日而
言者益廣亦訂之益精也若夫日下之所在息慎之爲方
此之闕疑師夫前聖

適汪氏仲姊哀誄

乾隆四十六年七月十二日日在西隅亮吉客西安使院
得舍弟京師報書知仲姊之喪質明爲位而哭烏乎哀哉
天高不聞喪我哲舅伊惟哲昆閨闈之仁烏乎哀哉秋林
隕風嘉實首墮高厓驚雷迅羽早落固知本傷者薈隕巢
崩者卵毀而未墮之翼迷音于霧雨在林之柯甘志于搖
落是可傷矣不有闡微曷云紀實烏乎哀哉姊諱蓀先府
君次女也先是府君舉一女婉孌穎惠未期而殤府君哀
銜于心朱識厥臂及姊生前志宛然固知一嚙之肌恩延
乎再世盈掬之淚沉痛乎九地雖在甫生而孝德已種矣
年及毀齒出就女師誦盤中之詩工九九之筭先王父尤
鍾愛焉年十一遭府君喪育于外家外家女兄弟十數人

聯裾爭華簪首耀玉見姊工作爭走憫之姊曰是貧女職也夫奚以恥桃林披華靡追乎遊讌風雨如晦尤勤于夜織一樓不遷十載于此焉一夕女兄弟十數人共坐室中比舍回祿延及寢室闔坐盡走不知其然姊獨却入室中扶外王母龔太孺人以起人以是異之伯姬待姆無下堂之嫌劉姜叩天獲反風之應誠孝之所格也年十五通論語毛詩蘋藻可掇無忘乎飲泉簞瓢亦怡陶陶乎婁空時伯姊已出室母舊多病一室之故姊實總之檐曰杲杲曝先人之賜書樓風蕭蕭值嚴親之諱日聞趙女之哭哀感路人聆樂姬之論化及鄰媼從舅氏妻董安人名知人嘗目姊曰端敏之性必宜爾家柔仁之資亦儀其母爲中外

稱首矣年十八歸國子監生同里汪君德渭相夫有禮處
家以勤上承君姑內接同室汪固巨族食指數千每伏臘
有辰或值宴喜堂寢左右列盈盈之百筵居鄰東西陳爓
爓之束帛侍婢林立行僮候門姊指畫裕如應機俄頃伯
姒歎其敏決媼嫗以爲神明于于焉肅肅焉豐約各適其
宜者也姊事母孝一歲迎養常及十旬亮吉以貧故輟讀
姊哀其志俾得卒業梁安定之室樊嫗繫其輕重李伯度
之學穆姜益其神智姊自處尤約曷澣曷否服前時之嫁
衣一餐再餐同守舍之薄餽然而釵之數質則周六親之
貧倉之屢匱以拯四舍之急蓋廓如也晏如也前後凡產
四男四女今惟一男四女在姊嘗謂亮吉日吳下之俗山

室之女資千金而靡吝授經之男脯一束而殊慊予每病之是以多金延師先日供具所以教者靡不兼至今子已授室幾有成立而姊遽以卒烏乎哀哉歲在丙申遭吾母喪姊及弟五人拊踊一室自是凡出處動靜必咨姊後行姊哀其衷撫視尤摯逮亮吉舉順天鄉試姊貽書及之勉以世德乃昭昭之言方鏤厥膺而冥冥之棺已闔厥視言旋言歸靡復伯姊之問松耶柏耶遂拱女須之里烏乎哀哉姊生乾隆五年十月二十日卒以今年五月二十五日年四十有一遂爲之誄曰

金瓠不存澤蘭永逝惟姊之孝申乎易世祁祁府君訓方惟義亦越慈母柔規靡替有鶯其文有玉其質哦詩習算

儒服是試歲之重光云值閔凶予羽飄搖室遷于東婉孌
諸姬耀羽綴玉姊居其間布裳整肅鄰之不戒燼其東南
赫兮沸湯伊誰克揆一女之勇逾乎百男惟茲諸姬自謂
靡及厥聲英英中外咸集歲華方殷事此夫子伊惟德門
克匡厥事慈親之訓民生在勤惟姊承之富而能貧盤盤
一編朝夕靡替云茲衰祚以望予季疇昔蓬居凝洹之辰
持編夜歸憶姊候門入室爨冰束火不溫姊勸我讀達乎
凌晨承師之資惟姊是恃曾三十年靡慰厥志重泉旣反
見母有期云此弱弟行猶棲棲伯遵乎西仲居于北宮旋
言歸靡有年載烏乎哀哉暉暉日月人所祈其壽我獨異斯
曷云不驟晏晏室家人慶厥居我獨異斯入室而吁曾昭

昭之昔戒復泐泐之別淚星離離而幾易魂遙遙而莫逮
昔昔之期夢姊于庭若戒塗而南適勅予季其東征朝陳
書而發冊懼宵兆之不禎詎徂春而徂夏慟一死而一生
烏乎哀哉父兮母兮惟姊從兮曾是鮮民不克共兮欲報
之德惟姊申兮曾是鮮民顏之醜兮情慟慟而哭姊志惋
惋而悼姑感衰宗于五載曾十輩而九殂維賈逵之永歎
服仲由之不除庶百年之倏忽永嘉覲于淵塗

晉太康三年地志王隱晉書地道記後敘

靈巖山館叢書大類有三小學家一地理家二諸子家三
地理自山海經至宋敏求長安志凡若干種先生以亮吉
羸知湛濁稍別廣輪每成志地之書輒預校讐之役閑蓬

執徐歲壯月所校太康志地道志二卷刊成授簡賓筵命書後序謹按太康三年者晉平吳後第二年也日南之地甫入與圖建業之宮裁爲郡治于是潘岳著關中之記摯虞成畿服之經王範上交廣之書徐氏作都城之錄唐李善注文選稱太康地志曰都盧國其人善緣高是知州郡之外又志八荒風土之餘兼詳異俗拓地萬里成于二紀劉石未興揚益旣滅令甲之所載典午之最盛云厥後賈耽之述四夷樂史之詳百國蓋權輿于此與王隱以作史之才著承家之美時則五馬渡江纔逾三主羣龍戰野已沒八州而史氏區區欲按伊洛之圖舉秦函之界雖寰中百縣曾隸方輿而海外十洲同夫飄渺撫劍及伊吾之北

而褰裳阻天限之江者焉今觀所述姑臧穀遠辨方語之
譌大夏令支補職方之闕采聲罔實或見誚于酈元綰籍
陳圖庶亟登于劉氏矣以此編摩推其紹述則仲遠一記
旣導美于太康彥季全編殊有功于處叔飲水知源撫柯
求葉亦沈約魏收之祖也

昭代右文坤輿日闢

皇帝復撰靈河之紀著灤水之源輿書歸于乙部盧牟資
夫

宸斷皇皇大哉莫以尙矣先生才爲命世學旣專家每集
一編期乎匝月煥綠字赤文之采補蘭臺石室之藏茫乎
莫測興望若之驚疑者勿言守闕如之義亮吉不敏遂不

辭而序之云爾

翰林院編修記名御史鉛山蔣先生碑文

先生諱士銓字心餘一字茗生江西鉛山人也先世吳越著姓彭錢世家祖諱承榮年十數齡值明崇禎甲申之變萇楚無室哀錢王之孫宛童寄生作蔣侯之裔父贈君諱堅生有異稟長而奇貧陳萬游俠惟云濟人申韓刑名祇除害馬年四十六始娶鍾太宜人逾年生先生先生含宏深之資稟倚魁之行年四歲母鍾太宜人教之剪桐葉以習書裁竹枝而成字聲滿一室智百常童時清江楊勤恪公以主事假歸過瑞洪見焉藥肆問奇先知遠志衡門訪友卽號通家越三歲鍾太宜人授九經畢贈君攜先生遊

澤州擊楫于洪河停車于霍太鼓接天之浪定異常鱗嘶
向日之聲知非凡驥館于鳳臺王氏者數年王氏樓接百
棟書連十楹先生達晨而觀終歲已竟時耆師宿儒咸在
驚趙禹之無害傲叔向而不能年二十二始隨贈君還鉛
山其年卽補博士弟子員時左都御史錢唐金公德瑛視
學此方見而異之有奇人之目國器之稱焉逾年丁卯舉
于鄉越十年甲戌以試授內閣中書又二年補官充
誥勅撰文中書舍人明年丁丑成進士改庶常自
朝考及散館皆列第一授編修前後充

武英殿國史館

皇清開國方略文獻通考館纂修官一爲順天鄉試同考

官京察一等記名以御史用省中四戶天象應其休徵海
內一人人倫資其模楷中壘之校秘閣是日兼官永明之
策秀才號稱得士偉矣哉仙人入宦東觀比于神山漢官
定儀太史高于上宰此先生之官也回翔館閣云惟廿年
眺覽巖壑中逾十稔武陽之干進若彼成都之守靜若此
然而凌雲一賦

天子幸其同時涉湘逾年

九重歎其不見是以道馭六合前席聆其極言咸約百僚
當官容其卧病長揖之下上相以矜名士之呼

禁中所定此先生之遇也至若雷電倚戶恣其發揮雲霞
在天從其剪裂植筆岱宗並日觀而爭秀回瀾滄溟與滉

間而競納五字未竟薄海誦述以迄殊邦一篇甫成薦紳
傳鈔暨于女士鉗耳之造象必乞高文駢臂之傳經亦求
定說繡平原而絲貴圖洗馬而縑空此先生之名也丁卯
乙未遭贈君及鍾太宜人憂哀至卽慟哭無常聲又終鮮
兄弟一妹聯其影形我送舅氏外家均其休戚祁黃羊之
薦友鄭罕虎之知人匹士未達夜寢于焉不寧一夫未安
露坐爲之盡策爲上客設饌無改八口之飢與踈宗合居
依然四壁之立此先生之性也執亢鋸之柄以扶倫紀踞
竈觚之識以飭士林王貢在位風俗比于鄒魯賈范入官
節義崇于性命故臺省未入已生列柏之風惠文欲冠先
起避驄之諺有緇衣好賢之雅墨車疾惡之聲焉此又先

生之志也梁木易菱激湍不駐以乾隆四十年二月二十四日卒于南昌里第春秋六十有一逾年歸葬鉛山禮也海內人士知與不知異聲而同哀遠奔而近赴烏乎哀哉蘭芷之芳不得見霜膏明而燐翠羽而殃痛彭城之廉里悼交州之讓鄉是知三尺之石不足書百年之行盈掬之土無以掩蓋代之名而松楸甫萌若有待于恒榦華表旣峙不無望于歸魂此則化人之委蛻入戶贈之三號柏堂之隕身臨穴增其一慟亮吉先生前主安定書院時肄業弟子也文舉之來魯國先蒙小友之呼步舒之至江都遂受專家之學立碑置墓植表景行烏乎隨武子之德我欲觀于九京郭有道之文均不慚于一字

蔣定安墓碣

君諱寶善字定安從舅企宸先生幼子也澤門之哲長號
多姿江夏之黃生而善悟爰自能言之歲卽標獨異之稱
母董安人尤愛之以善病未令苦讀也所居枕谿樓閣尤
勝成童後出居外舍軒楹啟日雲麗迷花門徑臨波風疎
振柳羣從旣盛執友時來饒茲勝地之吟益以華年之樂
君顧簡靜無所嗜也默然視層城之移陰與飛鳥之過跡
則停觴以思淒淚忽墮故銅臺之遊乏謝莊而寡韻南皮
之會有吳質而損歡一日偕送友人葬夜歸室冷無寐秋
蟲鳴階鑑薄影于星河弔浮光于林露是夕言神鬼之事
甚悉烏乎君蓋有悟夫年命之靡常而修短之合致者矣

君之卒以療疾遺命以道士服歛爲詩若干首母不忍觀亦納諸棺中化形之鶴猶愛羽衣識字之蟬偏隨病骨予與君知愛特甚自君卒及歛嘗守君之寢烏乎哀哉生何如死願入夢以諮魂夜已嚮晨尙陳尸而待暝君以乾隆三十年歲在乙酉七月二十一日卒年二十有三卽呂其年九月附葬于先人之壙禮也君聘妻孫氏誓節不嫁奉姑以居雖無子之痛較甚羊舌而嗜義之念有重熊掌可嘉也矣予爲君從表弟少君三歲懼夫江水衝溢高陵或沉爰爲立石于墓而誌其歲月云

靈巖山館詩集序

夫時至則爲者卿相然絳灌在位斯懷慙于賈生問世一

出者達人而邵管不升亦遜能于諸葛若夫承天八柱之才勲勒于五岳後帝七車之識名徹于三辰仲寶撰述燮陰陽而乃成元凱注經盟帶礪而創始則不朽者三事兼之于一人焉巡撫秋颿先生應靈潮而生有列緯之望先德則歷相唐宋望族則屢遷吳越爰自生初已徵異表練時日而拜庚子學春秋而知已亥然而大任欲降始遇已屯蓋公生十二年而先贈公卽見背焉公秉茲祖德飫聞母訓厲志于初服授經于蕭寺霜凌晨而辨色月映夕而開緘靈巖山館者公昔讀書之地也山石壁立披松檜之天風湖波浩然挹魚龍之奇氣命世之學根于此矣濟物之量兆其端云集之所由名也迨乎釋褐早歲襄職

禁庭鄧侯之稱典客國士無雙茂陵之策平津漢廷第一
以此達才冠茲朝彥允矣遂復百縑市紙旬日而賦三都
十吏侍書一晝而揮百牘樂彥輔之名言劉穆之之幹識
公殆兼之維時官京師者贈太傅錢文端公工部尙書裘
文達公刑部侍郎贈尙書錢文敏公暨大興朱先生筠禮
部侍郎錢君載少詹事錢君大昕編修蔣君士銓按察司
王君和從舅氏蔣先生和甯皆海內偉人士林碩望交滿
一世尤厚于公倡酬之篇于焉以富未幾

帝知茂倩之淡人望安石之切出蓬觀而建節過隴坂而
行部迄開府于全陝攝節于甘涼十年之中奇勲數著遂
膺茲

殊寵

錫以崇階涿郡三綬表應物之才會昌一品名等身之集而公事所届出玉門者萬里持節所及歷鳥道之百盤秦州書事之作野老誦其辭太白禱雨之章屬吏傳于口惠愛形于著述訓誡不斷于文誥自乾隆丙戌以後至是凡得詩若干篇合前所作編爲靈巖山館詩集若干卷神明之範非所識矣意度所在微得言與何則雅頌旣遙騷歌亦古斷于唐代不乏達人曲江感寓之篇元相言情之作常侍七日之寄中書三楚之唵無不弁冕一朝楷模來禩然或擷美人之香草殊少壯懷類澤土之行唵亦乖偉望求其稱斯名寔符于德度者實惟難之若公前後之所作

也魏行人之念母秦康公之送舅陸平原之勗弟鮑東海之寄妹暨于友誼尤富篇章山公致叔夜之牋庾令問深源之牘甚或慰耿恭于絕域書至而涌靈泉弔溫序于高原事久而含生氣性情之故有獨摯者焉至若九如所以答君貺五箴所以達下情韋孟愛君辭皆悱惻劉向對上言必懇誠是又求匪躬之節必于曾閔之門陳大雅之音先洗江徐之習者焉若乃際天人之學恢八極之槩沉想極于羲軒大氣包乎垓宇含墨未吐先翻積石之源擲筆而前卽有終陸之勢匪由人力殆降自天固知崇朝而雨天下必屬太山之雲盈寸而燭九幽實惟暘谷之日夫豈蓬蓬焉燭燭焉寸明尺澤之所可擬乎授簡暇時命爲之

序亮吉孤露偏同聞知獨陋宋楮刻而無用鄭璞採而見
知稱孔融之小友事涉抗顏受蕭奮之專經義當北面歷
茲年載備極譙談昔者彥升弁文憲之集云以述恩陳留
序江夏之文藉之垂法今之握管義亦云然至若勲名之
昭著惠政之周流則蟠松生徑將參召伯之棠多士在門
行闢孫宏之閣其紀于

國史著于金石者將與垂山惇物共不朽焉非所及矣

卷施閣文乙集卷四

陽湖洪亮吉著

與孫季逖書

季逖足下、僕遠閱千里、不覩一士、日惟陳書、頽仰宇宙、夜或秉燭、驅役魂夢、昨已冬始寒、尤逼人狂風一來、吹卷出戶、稍遲未覓、已過牆外、南鄰朽桑、蟲厚逾寸、敗葉旣盡、時來嚙人、車聲過巷、床几皆動、土旣不實、倏陷窟穴、離離黃蒿、乃長屋角、閒塵積畝、反不生草、地幸稍遠、掩戶避客、偶出酬接、皆至失歡、一再以思、未識何故、計念足下、顧戀墳墓、思遂南歸、寄跡丙舍、而田不滿頃、松才盈寸、溝水未活、谿橋不成、以此數事、尙遲年載、當復移家近冢、就姊謀居

對鵲營巢、徙魚築宅、林花悅魂、水鳥養性、招邀耆童、呵叱
鄰狗、一廛之外、更築生墳、門皆東開、易見日月、穴必西向、
暱就父母、松陰一樹、承以梅株、魚田半頃、圍此蟹簍、更望
足下、能來同之、當于屋旁、爲構數室、贍身之具、取給園蔬、
歸魂之棺、仰此林木、時直霜露、言羅雞豚、祀親之餘、謀以
醉客、如此數歲、卽復奄忽、良可不恨、嗟乎、續瘁之士、寡至
四十者、況開篋而視、已有傳書、入隧以觀、全具骨肉、後世
知我不詳、何人及身而思、惟有足下、自非親暱、誰能深言、
勉謀殮葬、幸蓄光彩、

重修唐太宗廟碑記

蓋聞天眷有德、五運所以疊隆、民報惟功、百世而有必祀、

矧大矣遠矣聿臻上治之休唐哉皇哉爰同中古之號則
黃帝之壽三百以畏其神炎宗之廟六十思廣其報者矣
醴泉縣唐太宗廟者自宋建隆之歲創自東郊逮明萬歷
之年移茲南郭嗣後百有餘歲曠而勿修守土者懼焉請
于上官發茲中帑銀凡九千有奇工甫數月而畢乾隆四
十五年歲在庚子也天作高山成萬年之寢室漢立原廟
藏一帝之衣冠固知魂魄樂遊之地近在武功神明永聚
之鄉先瞻谷口祀典所以重與夫閏位不列則嗣漢者首
唐大統有開則名宗而實祖必推其始有可言焉爰自黃
星旣見天習瓜分黑水羣飛民隨波沸未嘗知九州百縣
統于盈寸之圭四海萬夫責成一人之抱金宿則時時入

斗玉璽則頻頻出宮天地之厭亂至矣神人之望治切矣
于是六合再朗成于戊午之朝星辰忽降光茲甲乙之館
允矣哉太平之運兆于開皇十八年乎一治一亂運天地
之生前聖後聖拯斯民之死故上古未奠則八螯開媯氏
之勲中天未平則雙龍建神禹之績近古未靖則六馬昭
唐室之功亦越萬年甫聞三聖則凌晉跨漢越秦軼周者
焉尤可異者禮樂征伐並曜一時文德武勲兼隆俄頃定
龍鯨之駭浪握管而賦小池戢兕虎之雄威擘箋而唼艷
體何其盛也美矣君哉是以廿三年之政紀在史官十八
士之文歷于御製梁魏二武對金甲而顏慙高光兩朝見
華詞而色沮者也至于自家及國則畧跡論心陳混一之

策奮袂而起王師挈九五之尊拱手而歸嚴父此則漢尊
太上終非有位之稱周得武王方有無憂之實卽或閼伯
構釁元武貽譏此之播稱或云慙德不知西京歌尺布斗
粟廟亦稱宗東征賦取子毀巢名無嫌聖恢恢乎包舉天
人之槩非一端可議者乎知縣蔣君宰斯三載禮祀歷時
護青蒼之冢樹繚以紅牆法太紫之星垣建茲黃屋三過
昭陵之作世遜其工式瞻畫象之文人推其博當惟新之
落成乃徵詞而授簡亮吉再辭不獲三歎以興昔者龍鳳
挺質表偉度于書生今茲纛纛負文紀殊勲于下士則通
天戟戟曾嘉沈炯之表漳水浩浩永鑒陸機之文英爽邁
昔者諒鑒觀在今也遂使兒童父老嬉遊忘天日之尊櫬

棟几筵環拱聚川原之勢他日者過驗穹碑來觀典禮庶
幾衝山之風忽起西接上郡之祠如龍之雲怒飛東連豐
水之廟云爾

錄楊起文白雲樓詩序

白雲樓詩上下二卷今錄作一卷予觀其下筆不凡寄思
無朕回視聽于內而運徑寸于外一世之事不入于戶域
而千載之念時輟其餐寢茫昧于衣履之近而振悟于丘
索之表徹卷而視以鷄犬爲麟鳳枕軸而卧疑妻子若聖
賢故其言多古襲意寡近韻若曙色未啟天有昭回之星
秋飈乍興原多淩歷之響林木幽蒨欲晤言于山鬼宮徵
離合非有心于作者推其志亦欲混哀樂于一致然辭愈

達而思幽平古今于俄頃然心雖長而旨短此則達人促
朝露之期而撫編饒駒隙之感者矣吾鄉論詩者以同時
若干人合君爲六逸然觀其筆墨所至寄意所極惴格南
田集尙不能獲其彷彿則不欲更論也茂挺抒華于唐代
應德發藻于有明啟文振秀于

本朝蓋吾鄉詩人之冠也君曾孫毓舒與余善亦學君之
爲詩而意識限之上章困敦歲余月錄君詩竟因序數語
于篇首亦以明吾鄉詩之足傳者止此數人俾步趨者知
所嚮往也

祭保母王氏文

并引

保母王氏父本土族歸于某某無賴僦外家臨谿屋二間

貧不能出直母因歷乳兄及姊以償之亮吉生時母年五十餘司保抱者又數歲後母老且寡轉徙寄食逮亮吉補學官弟子母來賀因流涕語曰吾有五女而無子以後事累耶君矣及母卒亮吉適客外竟負前諾歸詢其女又不告母葬所因設薄醑招其魂以祭之曰

五女之門盜所不過母而遭此亦云家禍嗟嗟五女乃嗇一餐七十之年渺焉寡歡惟母之亡實惟我愆重泉之恨曩昔之言母難復生我述母德惟母之德人所不克烏呼藐孤而敢忘昔零丁孤露育于舅室兒之告飢母曾減食負而過塾聞讀以思母分傭錢兒迺就師皤皤黃髮助我親喜聞師有言兒讀善記兒童而冠厥聲英英猶未若母

仍呼以名如何有家不母之顧非我之尤實母之故周厨
歷室慨我之貧粟絲所入言當奉親維時我思母庶耆耄
我之報母非止一日囊錢攜贈于河之干母兮含悽送我
出門昔母之居廛荒茂草秋桃倚井其實惟好疇昔之辰
升樹而嬉攀枝撫實棘猶在衣今茲之來桃顛母死踟躇
半畝頻仰一世母亡誰知母葬未識負母何言呼天以擗
敢陳薄醖招此遺魂告子若孫無忘母恩

孫季述述倉頡篇序

倉頡篇者吾友孫季述之所述也粵若龜浮效象兎泣垂
文視狗知畫犬之形伏禾制禿人之字子夏釋物辨丁乎
魚枕秦醫說疾測蠱干蟲皿徵之竹素靡不粲然泉乎左

隸之分遂失前人之誼安國不以篆文存經而易之隸古
康成頗以便讀傳教而厘存故書是以白羊之印乖謬乎
六書烏馬之文微茫于三寫必窮其失可得言焉漢世諸
儒深研象數漸忽蟲文言星者日下從生說地者土力合
乙箸衣于求而古文昧增竹于匪而物象離以曲爲聲失
豐形之字惜加食爲餽違稍氣之本訓習甲乙之文誰分
鉤識作乙信弅金之識孰辨處者爲留自茲以降益難更
僕參首以𠂔能足爲三犯从戊己之形般有丹青之義書
狙狙而字改傳汎汎而文增爾雅變夫鼃鼃玉篇益其𧈧
𧈧訇改爲𧈧音或符乎漢褐薛譌爲薩字始缺于儒書楞
以四方切從十數此則呂顧偶亂于前陸孔復乖于後者

矣求其合者則八子系一士弓長草肅謠齊木且識晉
委妥可通非姜鼎而始見近芹本一證周彝而益明此則
謠詠合于經文假借通乎字例者也至若作旅車敦古義
莫釋帝儻之裔姓纂亡徵榼榦不登于昔編箇箇互殊于
傳注甯非闕如之義當同于聖者乎夫篆之降隸增減見
于斯篇文以括音精博昭于許說今召陵之書廣傳于學
者而上蔡之論半墮于梵編此季逯所急爲搜輯也亮吉
年逾數雜學歷五稊別石鼓之舍志在盍簪訪倉史之臺
快觀此冊云爾

南樓贈書圖記

南樓者外王母龔太孺人怡老之室也予以髫年過承識

愛別異諸孫之列策其淩絕之程先是外王父嵎峨君喜貯書有田十雙歲以半所入購積軸歷數十年而倉粟未滿書簽已盈又赴洛之後增蓄異書校閣之餘兼存別本每當朱明入序赫日縣庭陳萬卷于軒楹散羣函于室牖仲達之簡雨急自收高鳳之居麥漂不顧蓋自嵎峨君卒後輒遇伏日舉而行之一日暴書之暇外王母抽數冊以授曰吾家代衰矣能讀是者其惟甥乎予時十歲再拜受之迄今又二十寒暑追維往昔遽興九地之嗟時慟深恩頻展兩楹之殯蠹窺人而漸老螢入簡而不光陳留丈人之語王粲念之而覺悲扶風大家之書馬嚴續之而未竟又況校閒庭之月旦已乏人知授外氏之遺聞先無母問

淚浮于卷痛寄斯圖時乾隆四十四年十月八日是爲記
嘉禾序

兵部侍郎兼都察院右副都御史巡撫陝西等處地方兼
理糧餉軍務加一品服畢公再蒞陝西之二年今

上四十六年也燕康公之分陝棠表其年魏成侯之治秦
益銘其德來歌去思于于平原考六郡百縣循循乎成法
蓋下車未幾而四月登麥先慶有年三時勉農不遺厥力
皇皇乎新政之首效也未幾涼州一隅番回肆逆公靡分
畛域首運機宜元甲雕戈具軍于一旦白鹽赤黍籌餉于
千里

天子嘉焉叔子緩帶不張鈴閣之威元長黑頭早

錫上公之服偉畫所至蠡爾藉甯和風旣蒸應者日至于
是十日一雨天瑞實惟醴泉雙岐合莖地寶名曰嘉穀則
長安縣某鄉之某鄙一本兩穗之禾實生焉原露未晞旬
人以告猗與美哉于傳有之嘉禾因而名冊其效遠矣美
稷以之立縣公方抑然不敢自居欲附捷書因茲入

告此則江夏獻冊字美乎方書陽翟陳圖名貞于瑞志者
矣且禾名同本異類革心之應也種曰銜滋同生樂化之
效也匪惟政祥抑亦

國瑞亮吉以爲當立茲樂石貽諸後政遂原而序之云爾
蔣青容先生冬青樹樂府序

蓋聲何哀怨杜鵑爲望帝之魂變亦蒼皇援匭盡從軍之

侶遇金人于灞上能言茂陵值銅駝于棘中誰知典午又
況南遷烽火北狩軒輿言乎締造則東南置尉拓疆無劉
鼻之雄及此淪胥則五百從亡歸骨少田橫之島嗟乎江
山半壁非僊人劫外之基金粉六朝盡才子傷心之賦今
之作者意在斯乎昔者申徒下士赴清冷而不辭精衛冤
禽投滄溟而不返此之挺質本視鴻毛未有九重端穆辭
黃屋而乘桴萬乘輝皇褰龍裳而蹈海此卽鱗臣効順不
能使東海之波不揚而孱主奚堪更非若南征之舟不復
者矣夫赤眉構禍隆準之窳斯開臨洮肆凶銅馬之帝遭
酷不過行同竊鈇號等摸金雖下竭于三泉尙不讐于枯
骨而此之慘虐更所難言斷首剝膚毀裳裂冕烏呼吞炭

雖忠智伯之頭已漆納肝較晚懿公之體先殘至于掩骼
之仁出自采薇之士問中興之顯運荒土數坏慨六葉之
承華冬青一樹卽遺黎之感槩何補于在天之沈痛也哉
雖然萑宏化碧激哀周義士之心比干剖心作洛邑頑民
之氣焚山之節旣顯之推匪石之誠亦逾生畝若夫廬陵
信陽之大節其效龍逢夷叔而分塗者乎迫至風雷一警
遂歸先軫之元陵谷已遷尙識王琳之首哀矣怨矣求仁
得仁蓋士感知已伯牙碎琴義激友生漸離擊筑效包胥
之慟哭慷慨登臺賦宋玉之大招旁皇生祭三百年之運
已盡庚申一二士之心猶回天地覆亡之慘從古無斯而
忠義之忱亦于今爲烈者焉他若生而玉食長自天家山

陽哀痛之語命在何時樂陵永訣之言兒乎奚罪柴車而
辭鳳闕破夢而入龍沙烏乎富貴已空神仙何在徒使玉
輦金輿禮化人于西域黃冠繡舄望紫氣于東來此則靈
妃入道固無心不死之方而室主移宮獨甚此未亡之痛
者也況夫微子朝周猶存禮樂項伯入漢僅事功名韓王
孫之晚節漂母見而益哀劉宗室之陳符列宗聞而大恥
他若運屬當塗華子魚尙稱名士言歸石趙王夷甫更侈
清談彼人是哉何足美也嗟乎蘭臺著史婦豎不能識其
辭隴西隳聲搢紳或爲諱其語何似取陳留之軼行抵掌
而說中郎借赤壁之遺聞快意而談諸葛則人驚伯有或
能廣問老之傳而鬼有董狐殊堪增竹素之色先生于是

屬爲之序遂著于編若夫聲音之道文字之工則讀臧洪之傳髮自衝冠登廣武之原皆先裂血抑至此乎非可詳矣

長儼閣遺象贊

長儼閣者吾友孫君季述妻王孺人之棲止孫君悼亡時所署者也桃枝亘幔松陰灑窗歸魂之房入銀燭而不輝同心之帳棲流塵而易故墮釵在握遺粉懸容爰成永逝之文迺有傷心之賦然而草本忘憂禽原並命窗深共坐紅圍四面之花韻險偕吟墨染崇朝之頰春寒而手握微溫酒冷而衣香互覆又況華星被野晨露迷原翩爾來斯溫其如玉爪痕在竹畫自何年衫影驚魚窺來靜夜比肩

而尋幽墅擁背而候江湖境難淹于百年魂遂斷于五稔
夫三辰離離初無停鏡之影四海浩浩曾靡駐波之萍葉
離枝而咎風禽頽巢而怨雨達士之識已悟無生騷人之
吟方悲未艾于是遵茲往屬寫彼遺形唇朱不塗帶碧猶
摺誓長帷而不娶留空室以自娛可爲情逾于分哀過其
禮者矣象成屬爲之贊僕固未之許也繼思散其哀以達
其志爰爲之書其首云

朝暉嫌明春色賤冶零愁淒川積想傾野魂兮雖斷猶手
一編韶華幾時落葉積前悟浮生之易盡兮亦何必希乎

大年

送汪劍潭南歸序

夏序忽來獨居已覺絺裘更雜以風雨晝長宵短興寐
不定置鷄于窗將以警旦乃復鳴夜籠鐙于牖所藉燭暗
不覺妨月意緒乖違跬步錯失貽譏儕輩匿笑臧獲蓋自
子欲歸已不憚累日幽憂不已將成疾疾繼而念之吾與
子食桐江之魚棄子悉已成鯉擘山院之果遺核又復抽
林蓋山川悠悠言笑宴宴不自知元思之減華色易醜也
且吾與子得曜影數紀振響十步中下之士樂與齒序瓜
桃之戚識其嗜好閉戶以處雄長婢僕出室而遊亦有處
所無時于明以視日星不跛于履以羞厚地握管徑寸上
溯結繩申紙逾尺下窮倚杵自謂鬥毛角而俊視植物而
靈者矣何必移原隰之草萃于一丘招高下之鳥同棲一

樹始欣欣合色喈喈均響哉吾子行矣奔轂戒疾涉川鑒
沈凡百榮利以爲子箴憂無傷性喜無蕩心百歲相保有
此骨肉怡怡飲食跂跂動作從此及老脫復偶遭髮白面
皺起而相嘲勞千聲于蚓窾假一寐于蟻垤冥冥于萬古
憤憤于七尺無紖于覆載無害于動植蓋同形而化者不
無聖賢代我而生者又有孫子也子行矣子不能飲勸子
以食子食而咽歌以蕩魄歌曰

風起匝地雨落晦天念子不見卽如百年百年亦勞有生
有死其間握手乃在吾子此無彼厭子不我嗔飽食嬉遊
以說性真各知其短愛契所長閱于歲時殊忘否臧誰驅
而出誰挺而走念子之歸倏如驚獸投林覓柯不擇其音

慨我之留得不怪禽獸則有穴禽無故枝歌曰贈子孰知
我思

與崔禮卿書

禮卿足下霖雨南北泥塗接天驚禽不飛巢樹越月東渡
清濟西抵河洛麻麥千里川原百重披林知晨映水識夕
登陟勞頓宿患轉失犇車乎滎陽覆轍乎成皋暑疾破腹
言停偃師炎風裂衣乃徑函谷時值深夜危連十車土囊
陰陰千丈落月離樹冠斗鵲巢冒星車聲崩雷雜以谷響
時復卧起不識昕夕沈沈燭光映曉青紫驚沙濛濛當午
黃赤如此三日始抵平陸更復馬首斷雲千里隨夢雁足
飛雨崇朝灑襟雲山恢奇殊涉遐想念切吾弟南行涉江

帆驚蛟龍、棹壓魚鼈、茫茫混混、始復觀海、殊足增長氣識、
濬鑿心智、海日上樹披蓬而觀、江豚逐舟、瞠目而視者矣、
歲華不居、游讌已極、往者都下羣從如龍、連輿接茵、尤在
吾弟齋居盤盤、言笑宴宴、晨樹撼鵲、于以極興、夜寢列燭、
求其悅魂、始知美酒一石、增劉伶之狂、嘉言三復、損臧仲
之疾、非昆季之愛不及此矣、近聞楊生夢符遽遭此厄、僕
亦遠病、重有姊喪、秋堂流螢、不夕已卧、東陽帶圍、減此盈
握、潘岳病髮、時元一莖、追亡悼存、撫近念遠、以此慘戚、遂
減跳盪、時復咄咄、如何如何、吾弟方在盛年、尤復嗜學、六
經收其視聽、羣史供其口實、暇則縱棹幽遠、振袂原野、壺
觴旣列、遠憶狂客、松徑落落、肖我直致、則亦西望不樂、北

遊方遙、丁生、丁生、履端共此寥寂、哲舅既別、亦寡音耗、遠聞太公循績斯茂、所得如此、并報吾弟、東鴻若西、有以荅我、

四哀詩并序

秋日苦雨、南山多陰、校理程君晉芳忽焉溘逝、悲盈于中、

十旬輟業、又頻得友人書知贊善鄭先生虎文文學唐先

生為垣暨司務楊君仁基相繼物故、傷哉傷哉、命也、命也、

予穉齒未毀、執經豫章之門、元髮乍束、交友宏農之館、耽吟握管、則贊善播其英聲、研經著書、則校理長其浮譽、歲月既往、中心藏之、師友之間、人倫盡矣、于是擇窮陰沍寒之日、招秦吳燕越之魂、陳觴而言、為位以哭、哀哉、原夫贊

善之志古人是期梁傳太息之裹步兵痛哭之槩操一于此卽能損年兼而有之斯多戚緒然而談縱八極戢黃髮以入棺交滿海寓御布衾而辭世雖云悲也可無恨焉文學自少至老爲詩五千窮年累時質券數百授經之席移市門而便沽問奇之酒呼里魁而對飲推其梗槩實不可一世焉校理生有積貲沒逢奇窘將居北山之北訪友南山之南四馬駱駱載傳書而來雙旌蕭蕭斂體魄以去是可哀矣司務累葉清華一門要劇而焚研之後旣歎數奇毀巢之餘又窘陰雨命之永不憂殆傷人者焉嗟乎統而言之贊善之達不勝其憂文學之窮未改其樂是知沈魄逝矣招雍門而鼓琴天懷廓然逢劉伶而市飲校理則魂

無避債之所司務則死餘對獄之驚朝露之痛不越乎兼
旬秋霜之威遂凌乎萬物日之夕矣鑒素月而不輝天何
言哉隨大化而俱去百年之壽不能與麋鹿爭十步之外
或當與松柏處所以各述其衷抱繫之以詩者亦以通存
沒之情均哀樂之致也詩曰

猗惟贊善身沒道存下視百世心縈古人積憂炎炎寢室

以焚

室前毀
于火

逝川東來高岸亦崩沈痾作書告我以誠魂

如可招越之東門烏呼文學以酒自晦闔地軒天沉旬緬
載誰云閉門默坐而慨草元未就西日歸海質券雖積囊
錢猶在欲奠先生吳之里市校理覃覃士流之冠湛彼經
術足于文瀾著書何多云以待刪說士之甘一世所難宦

既不達西行入關驪歌召哀往而不還神氣所聚歸于南山司務英英弱年嗜古玉立旣振金聲徐吐挹茲襟抱孰云步武方秋之朔如月之午頻傷疾疾遽委蒿土縣棺有待殯此江潯